

葉天寥年譜

卷之六

葉而鳳年普

一齋續普一齋

初記一齋中

於日注八齋

吳興劉氏
嘉業堂刊

序

孔北海云歲月不居時節如流五十之年忽焉已至人生一世眞如駃騠馳隙也然大抵安樂之時少憂患之時多豈惟忠臣孝子剖心泣血卽保身明哲其於平夷境會遇之能幾余視少年時猶昨耳殷憂多故曾亦屢更及今老大徒悲黯黯神往悠悠忽忽竟不知何以至此十歲以前勿論矣自十一歲先大夫捐背迄今四十年來其閒晦明風雨悲忻得喪所可爲色舞者幾何流涕太息者又幾何歷歷在我目前而追之已杳不可得盡歸於夕陽流水也久矣故爲子則藐而哭父晚而哭母爲父則哭將嫁之女將婚之子爲夫則哭婦爲諸生

則藍縷其衿二十餘載爲臣則灰隄沙岸攻金削築離
夫妻子母而若不敢保其生爲農則儲瓶之粟日以匱
先人一二不腆之遺平爲富人屬券上之不能高議雲
臺之上分

聖主宵旰憂下之不能翰香墨蠹昭垂來禩僅僅張季
鷹莼菜鱸魚向資疊閒消遣愁日而二三年來日以眼
淚洗面西河其北堂交痛掌珠與眉案偕傷撫今憑昔
低徊問影有一善狀可容自慰者耶至於雞鳴如晦羊
腸空歎一劍銜恩孤琴絕鼓黃公酒罍之醉步兵窮途
之哭豈無簞貧之怨或多兒女之情簡點生平悔尤實
甚遽伯玉行年五十而知四十九年之非況我儕歟爰

昉己丑弧辰迄茲丁丑稍爲詮綴竊附於知非之義焉
李羣玉詩往事隔年如過夢舊遊回首漫追思日久情
湮凝眸而恍憶者亦什之二三而已矣庶幾感慨係之
亦聊以記吾過也崇禎戊寅夏五之望天寥道人葉紹
袁撰

自撰年譜

嘉業堂叢書

吳江天寥道人葉紹袁撰

余自孀憂多疴情緒迷離岑晝長虛幽更難曙
神傷孤月思愴繁花瑤草徒芳江籬空綠風蕭
結黯雲漫生愁往事閒追每掩蕙茹之涕餘光
堪惜聊希竹紀之書其閒愉戚悲歡晦明往復
歲渺渺而云徂撫懷慷慨境悠悠以成夢留想
徘徊回首昔非敢圖今是悵披文之恍在久忝
爾於所生假我何如修身以俟云爾

神宗顯皇帝萬歷十七年己丑十一月建丙子二十四
日戊辰生先是十四年丙戌先大夫登南宮授浙江山陰知

縣錦旋歸省俄遭先王父艱至是服除赴補思得三輔
內地蹙棲鳬舄故脂車邁邁時卽挈室偕行也路抵臨
清河冰已洳太宜人誕彌已迫不能任載驅之勞從夙
駕之役矣風塵紛薄假館居焉先大夫筮日戒塗孤旌
獨往羈人旅舍曉起治裝適余以寅時生洗兒甫畢馬
首遂燕太宜人云先大夫蓋喜動顏色忘乎蒼茫之感
離索之懷矣

齊魯之俗兒生三日必艾灸其臍則終身無寒
疾之患故亦效爲之不意火氣攻中通身如水
晶太宜人日抱以泣幸善醫者療得無恙辭文
清公初生時亦如此內明外映腑臟皆見人謂

之水晶孩兒余何敢上比昔賢然文清公父則
玉田學博也文清生於黌舍中余則生二月而
後至彼耳

十八年庚寅二歲先大夫於十二月已補薊州玉田縣
知縣古藍田陽雍伯種玉處也低徊霸烈則昭王之墓
在焉盱眙仙蹤則無終之竈存焉先是袁司馬公卜居
湖渚煙波相望文壇酒社日夕共之及丙戌通籍同出
楊貞復名起元太史門下就令寶坻又與玉邑繡錯也先
大夫故有四子俱殤至是太宜人語曰吳中風俗恐子
不育者寄於他姓恆能長大我懷此想久矣今三千里
外舉目爲誰乃有知己良朋關山咫尺豈非天假機緣

弗可失也會司馬公亦屢有異兆載徵於夢故遂決計
爲螺贏之負焉時余生四月也在寶邑因名曰寶生

十九年辛卯三歲在寶坻

二十年壬辰四歲司馬公晉職方主事尋以遼東贊畫
赴援朝鮮余在襁褓隨其內宅南歸

二十一年癸巳五歲司馬公出塞與大將軍李如松不

協喉言官李如華論奏奪官左都御史溫公一齋名純考

功郎中趙忠毅公儕鶴名南星疏救不報司馬公旣賦歸

來移居新築地名趙田去余家十五里

二十二年甲午六歲在趙田六月就外塾

二十三年乙未七歲

二十四年丙申八歲嬰疾幾危猶憶日下春矣此身如
在茫茫銀海中蒼煙白霧躡空而行忽有瀑布飛湍砰
激我身甚冷乃驚寤則一老衲坐牀頭誦大悲咒以楊
枝水灑我頭上也鐙火熒熒諸人對泣已漏下二鼓矣
二十五年丁酉九歲日食之辨雖謝子珍天悟之慧妄
希平叔時黃宮詹葵陽名洪馮祭酒具區名夢董宗伯
玄宰名其昌凡過司馬公家無不歎愛者幾有追步惠連
之賞余時雖小今猶能憶之然名賢鴻鑒如許負之深
矣可勝自愧

二十六年戊戌十歲先是顧忠文公涇陽

名憲成

首銓曹

先大夫鄉試同門至厚雅也秩滿擬以先大夫代之先

大夫堅辭故僅晉司空署中是年以虞衡員外郎爲丹

陽姜宗伯

名寶

蒞視襄事棠暄冀北徒留崔沔虞曹花粲

江南僅發張衡隴樹於役旣竣暫返里門爲余求燕婉

之匹得沈宛君委禽焉憲副懋所公女也

公諱堉

庚寅二

月十六日生年九歲矣蔡女知絃由來比慧甄妃弄筆

正值齊年十一月余歸家先大夫命以今名不忘德也

二十七年己亥十一歲先大夫升貴州提學僉事天遙

羅甸地絕牂牁龍標之悲涼而偃薄青蓮之慷慨而迴

翔也祖母崦嵫夕影徘徊縈念於是解組謝時築隄湖

上隄植垂柳穠桃海棠芙蓉俱各數十本蓮葉潏灩滿

湖渚閒春波載酒夜月流觴坐看紅蕖飛綠草而成茵

閒聽黃鶯喚白鷗以點水終焉之志於斯足矣亡何天
降鞠凶遘逢虐厲自夏徂秋河魚疾作芎藭虛御濕之
用菖蒲竭蔭年之術八月十二日奄然捐背余自歸家
未盈一載遽遭此慘尙忍言哉時先大夫止四十二耳
郭有道人倫之鑒遂盡此年仲長統樂志之風僅多一
算泣寡嫠於霜幃號藐瑯於雪幙易簣之後貧無爲殮
秋粒將登不能待刈賣田供費而已

二十八年庚子十二歲緹琯之後始肄操觚歲行暮矣
僅成數作有又反之一文云以宗子而迴車廷寢曰得
返舊宮以冢君而鎮撫海服曰得還舊物以中外而快
觀新主曰得瞻舊德以臣民而共承新命曰得事舊君

初學有此見者異之以爲必當早成而偃蹇不偶至三十餘歲始獲解褐故知名之遲速不論也

二十九年辛丑十三歲自先大夫亡後淒涼萬狀太宜人對秋風而掩泣覩明月以摧神寡婦孤兒杜門苦守幸矣強宗悍族橫加刀俎疇昔徼潤微澤霑餘瀝青松示心白水旌信者靡不操戈樹難戎首興仇豈止總帳猶懸而客去墳草未宿而賓絕哉婦翁沈懋所又以苜蓿片席遠在中都惟司馬公敦故人之誼恤孤子之哀我族人無賴之尤卽曲詆而毒噬之當年郎署已老馮唐舊日將軍誰知李廣生死交情徒隕翟公淚耳時令吾邑者爲西川劉勿所先生非藉仁人力垂惠庇家

門殄瘁有今日歟惜乎哲人云亡金玉已遐未賦謝朓
之酬僅一附韋泓之哭也

先生名時俊由吾邑令歷官太僕卿二子潛登進士泌西

川解元女文玉以詩文著名蜀中

三十年壬寅十四歲孤瑩之家未諳禮制不知二十七
月也迄是秋八月十二日三週足矣始爲告除靈帷更
去縞素三載几筵依依朝夕忽焉座虛位撤幙捲牀空
恍惚之閒音容益邈母子相抱悲不自勝是夜淡月流
天花影橫地冷露無聲西風初響僧歸人散一鐙熒然
淒涼景況今猶如在也

三十一年癸卯十五歲芄支之佩初試於邑侯劉勿
所先生學博蔣笠澤先生

名弘憲宜興人

召面試焉試題古之

人古之人文成共相擊節中郎之歎元瑜步兵之賞濬
沖矣惜橐已失去兩先生月旦徒付子虛耳六月采芹
於泮方朔之年未能學劍舒祺之歲僅補黑衣是年識
管東溟先生闕黨之訓受教多矣

三十二年甲辰十六歲讀書司馬公家識于中甫先生
先生名高天下登龍御者羨李司隸之威儀歎鴻冥者
想謝太傅之風采獨余以初升之童先生品以公望之
目嗚呼德輝邈矣典型不再碑餘北海之門淚灑西州
之路是時余亦自謂流鶯初羽卽囀芳林乳燕能飛早
開金箔而乃沈淪玄草寥落青衿陶弘景云我年三十
六方奉朝請昔人感懷遲暮之年是余聞喜曲江之日